

公

是

集

集

公是集卷十五

宋

劉

敞

撰

五言古詩

效陶潛體

出門逢一士抱書亦南山問其何爲爾欲語輒復歎少
小貴詩書志業覲孔顏爾來三十載鬢髮倏已斑唐虞
不可待世譽亦恥干寧赴巖谷老行行未遽還其言乃
可感使我再淒然人生歸有命窮達何足言勸爾飲此
酒唐虞在其間

懶詩

分表難強營俗中彌不堪始覺懶亦真功名焉可貪婆
婆玩流光幽寂性所諳束帶愁逢迎燕處倦亦談碌碌
史隱間將爲茲世慚

菖蒲

香清自足愛味厚非所倫如何缺缺徒反以花爲真花
奇不可見舉世皆忌辛誰將擢仙骨願比芝苗珍

登薦福寺山亭

時事如不聞煩襟尚鬱怫高亭一何壯俾我遺外物是

時夏景初竹樹雨飄拂燕雀飛簷楹喧爭互強偃世紛
類如此小大何得失始知絕羣動方外真有佛此地可
終隱不惟謝炎鬱逍遙曠其後豈恨久蟠屈

九曲池

廣陵春欲歸九曲池先暖積雪未全消流波已潛滿宮
城落喬木岸竹排纖簞古事無足悲登臨苦日短

和永叔夜坐鼓琴二首

衆人于五音醜正不醜隨所以匣中琴寂寂少人知淳
和太平風簡淡遠古時得意亦忘言居然見無爲非公

蘊真樂此道誰復期

知音古亦少況乃今人乎至和動殊類此則今世無舜韶舞百獸事可觀于書但非耳目接便自疑其虛誰謂今之人反不如獸歟大音蓋希聲聾俗或萬殊中孚有不化嗟嗟乎豚魚

苦寒行

驅馬涉長磧千里徑無草天寒日光淡積雪常杲杲勁風裂肌膚狐貉甚魯縞況我被甲鎧寢遲起常早崔嵬陟高山日落尚遠道人生各有命豈憚事遐討飲冰傷

心骨重趼如巨棗義深自勗勵身賤寧要好親戚何可逢功名未自保少年慕壯健我獨貴疎老

送霍邱謝寺丞

吾聞歐公客必皆當世賢衆中一見子始信斯言然綵衣得意歸笑語春風前輕賚尚方履去影裊翩翩百里不足仕桂枝淹華年故須多種秫爛醉揮鳴絃

答黃寺丞濠梁雜詠

閉門委餘事久矣臥幽寂忽枉臨濠篇如逮問魚客山川盡寫做人物多在昔形倨游自遠善行固無迹吁嗟

相知晚起予遽多益乃悟文字工足兼造化力熒煌淮
夷珠磊落荆山璧他人竭澤求吾子希世得禽微戒輕
彈路暗慎虛擲如何忽在此詠歎生感激

蠙珠荆山濠梁事實黃州

賦也因以爲興答

黃寺丞九月十三日見寄

茲年見二毛秋至獨多悲況乃霜露繁悟彼歲月馳衡
門靜無轍幽徑荒不治眷眷武夷翁傾蓋成舊知每枉
林下步笑言輒移時目擊良已久鳳歌復見詒諒君倘
徉意當以振其衰

生槐

冉冉庭下槐蒼蒼山中檜臭味久矣殊榮枯莫相待胡
爲寓形生曾不異風概擢榦初無根交陰忽成籟死生
謂膠漆幼壯亂姿態本同非不佳末異終恐害吾意造
化巧淫樂爲狡獪玩此三公才比之女蘿輩不然世俗
薄荷合恥剛介忘彼特立姿樂附柔弱類誰能極物理
且以嘲大塊陶冶如吾言庸庸亦何怪

櫻桃

東風吹陳根萬木含芳華客愁獨不改浩蕩津無涯朝

公是集 卷五 天舒帷校
光破浮陰暄鳥聲交加櫻桃此時盛滿樹紛彤霞當戶
仍拂簾參差自相遮日高臥未起顧見驚且嗟此復幾
日繁譬如空中花非無一樽酒玩之到景斜多慮使意
衰悵然奈爾何

摘櫻桃

此花前日時素雪搖東風已驚變濃綠忽更垂繁紅俛
仰物三換歲華終無窮因笑樹下人未悟成老翁磊落
火齊珠參差珊瑚叢贈遠限道路成蹊縱兒童

春陰

朝日送風光宿雲濃不卷微陰助惆悵旅思增婉婉新
花秀且含芳草綠更遠樂賞及融怡春暉未應晚

除草二首

昔歲有壯氣恥事一室中獨願埽萬里指麾走羣雄少
壯意更衰棄書學老農羈旅無田園飄如野間蓬徘徊
陳蔡間嵒岷見楚風託足不期廣所存一畝宮秋草日
蕪沒荷鋤事兒童歎息念變化古人頗固窮

中庭不踰畝百草何荒蕪綠葉間紫莖薰蕕互相渝所
憐薄筋力豈愛不掃除賢者曾蒿萊吾徒亦何如公侵

潘垣出蔓也自難圖下牀值蛇蟒依隱行鬱紆至使蛟
蚋多不堪匝肌膚古人遺我言芳蘭戒必鋤努力蔑小
惠作詩感躊躇

早發襄城之龍山呈曼叔

烏啼齋前樹促駕吾當西朝從良友別夕赴幽人期方
以會合喜敢曰道路疲予慙昧時利百事棄不爲惟有
好賢心未媿緇衣詩

敵來速嘗新酒

徒喟無與同徒歌無與和徒行莫之友徒語無所破慷

慨一無徒始覺從君過欣聞酒新釀堂有佳客座歡從
尊罍罄醉聽冠巾墮庶可效名士因君讀楚些

日醉

犀首從橫時無事猶飲酒我生太平際日醉亦何有太
平多賢才臺閣固其藪濟世圖功名汲汲常恐後我寧
樂自放甘與物俱朽顧惟人間迹澶漫獨已久智謀乏
施設筋力倦奔走幸爲朝廷知而免職事守人當自量
度快意安所受何能強繩檢希世視自負晶熒流霞波
泔淡白玉斗歡來無虛席嘲笑命賓友殘冬雖餘幾自

足數開口浩歌迎春風安用獨醒叟

寒蘆

雖居江上城不識江邊路故移蘆葦叢粗慰江湖趣翠
華侵硯席疎影入牖戶歲寒待爾共好尚與時迂勿以
比蒹葭蒼蒼瘁白露

和兩府諸公馬上作

富貴信多士況乃主恩深京洛多風塵冠蓋自成陰片
言代拱璧一顧溢千金嗟我固貧賤處俗謬浮沈咄咄
人間世俯仰媿山林

和永叔十九韻送魏廣

信陵貴公子仁義不掛口猶有三千客名聲極高厚而
況賢者門四方所奔走豈無青雲士磊落照前後我雖
非其人慕用意殊久差池混出處百望乖一偶羈旅陳
蔡間茫如喪家狗擔簦始自致傾蓋許白首中堂陳詩
書高會置樽酒豈惟聽餘論復喜識賓友魏侯希世珍
頗為平生舊他時恨契闊並生喜邂逅危冠切浮雲長
劍掛南斗同志此莫逆孤游信無負切磋變新巧彩繪
飾餘醜自謂當窮年如何復分手士生得所師文學致

不朽吾衰莫自力子壯諒何有當取天下名還為生人壽

遊龍山

孟公乘興出必造龍山頭回望默不言夕陽始還轉千
年雖悠遠此意故風流咄嗟無知者寂寞空荊州霜風
蕭騷晚楚水荒涼愁安得款段馬往來時獨遊

放鷓

上天賦爾材若不受羈紲失身偶見獲羞與家禽列秋
風半夜起鴻鵠兩飄瞥物生各自適聽爾歸寥泬白雲

入雙眸尺地肯自屑慎勿逐鷓爵案原本不足絕不過
缺二字倉廩中朋黨為偷竊鳩鴝最堪憎擅使芳草歇勉力霜
霰期方為鳥中傑

鳴蟬

芳草久已歇星火奄向中日暮立蟬鳴歲華坐將空輕
舉塵壤外逍遙神仙同豈伊感時節悲嘯臨長風夕露
鮮餘潤炎飈成蘊隆清虛浪自足高餓亦云窮

和聖俞十二韻

處世誠碌碌白髮生滿頭所以不自慚數從長者游醉

翁名世者事業歸孔周獨立千歲外邈然已難儔韓范
青雲姿奮飛起西州徘徊霄漢間下視輕蜩鳩詩老最
前輩名聲三十秋篇章被海表豈獨魯與鄒今我親見
之執鞭乃所求何況登其堂舉觴預獻酬清談破羣疑
嘲笑寬百憂以此捐歲月吾生同悠悠

宿綠溪

雲昏江水闊兩淮不可測山丘望亦迷馬牛豈易識高
帆乘長風俄頃屢敲仄未知所趣向稍稍萬寓黑近津
見蘆葦其外水正白操舟投其間宿鳥俱闕易水深不

可纜叢梗以爲力蚊蚋秋尚繁不眠坐通夕中宵風逾
厲潮水相蕩擊安得似人者警欵在我側天明啓牕戶
願見白日色莽蒼場谷間竟爲霧雨隔追觀宵征處波
惡生悸惕絕糧非陳蔡從者亦悽惻

如意臺

泠泠清池水汎汎不繫舟興來可獨往興盡難自留留
無淹回責往無進取憂世人共擾擾真賞空悠悠章華
楚人困姑蘇麋鹿遊君看如意臺乃知賢者謀

閔雨

長夏炎氣隆高田劇焚燒惜哉淮海卑無力能沃焦起
顧郊野間離離悉苞蕭日夕多狂風飛塵蔽招搖誰能
起蛟龍雷雨蘇宿苗眇然坐自想幽意增煩歎

和過騏驥院觀馬因飲李氏夜歸復與江謝會于

敝居

子真王濟徒愛馬有馬癖每嫌駑駘衆未覩千里格竭
來飛龍殿一一數白黑始驚麒麟骨秀出無與敵旗旄
亂雲霞鼓吹喧霹靂從容看回旋感激私歎息此當逝
崑崙上與天無極奈何局軒陛終歲老羈勒主人貴公

子埽榻多命客聊欲寬其意無爲稍戚戚珍羞雜水陸
清酒漾金碧嘲笑心日開留連日已夕歸來興不盡駐
馬問所適知我方會友投鞭遽登席貧家竟何如脯醢
之餘力歌舞復無素兒童強敦逼多君平生懷不與貧
富隔歡來亦酩酊俛仰愧三益

早行

雨息風亦止落月猶在天舟人相呼起稍出蘆葦間暗
中各紛拏四聽聲正謹開戶視所從大江自漫漫衆星
若連珠纍纍浮深淵津涯杳難知勢與天地寬俯見舟

楫微萬牛一毛然虎豹嗥岸傍蛟龍浮其涎兢兢抱危
懼忽忽忘食眠人生誠多憂况乃行路難

重陽日得景烈送酒

歲晚見黃菊悲秋空復情故人豈知我朋酒適平生舉
杯遠相屬目盡歸鴻聲醉眠東籬下此亦淵明情

和焦生石字韻

我惟一逢掖入爲二千石聲迹不相同禮貌謂誰敵旣
許游藩籬又喜升宴席酌酒澆礫魁賦詩聽警策朋從
常苦少佳節古所惜旣醉忘形骸笑語俱莫逆使公貴

且壽富有貧賤客

寄隱直

會短別日長愁多歡情少古來人間世于道同擾擾我
髮日已蒼我顏日已槁離憂固如此四十未應老誰能
跨浮雲相與乘莽眇吾子心莫逆庶當悟意表

旦日城東渡汝水與鄰幾飲別歸作五言寄之

繁霜墜衆木朝光破初寒游子侵旦發隱忍行旅艱走
馬東郊門別愁莽無端川長不可厲泛舟觸波瀾相及
墟落遠解驂請盤桓班荆道路側酌酒還據鞍殊鄉閱

人多浮俗見子難結交形骸外生計出處間江湖天
涯冰雪歲欲闌昔賢往不反子陵與伯鸞東游信不惡
相望終永歎

寄深用君章

爛漫十日飲未快遠別情醉魂幾時醒直見潁水清前
歡絕莫尋離念紛更盈車騎暫休汝賞晤得時英披襟
兩相照話言僕屢更論史既袞袞說經亦鏗鏗一觴亦
一詠樂事真相并會合固難常我獨嗟南行回首念前
好感物非嚶鳴明發成寤歌勉勉趣遙程

寄裴吳江

王喬一雙鳥乃是尚方履誤逐閭闔風飄然太湖水湖
水連天涯茫茫湛清輝秋來興不盡似欲都忘歸玉疊
鱸如雪碧壺酒若澗醉輒問左右何如張季鷹君乃蓬
丘人神仙有名籍不應自放浪久爲塵中客我頃臥廣
陵西風見白髮八月觀海濤壯心謝超越因欲解印綬
從君五湖游功名非所及爲具鷓夷舟

寄贈獻臣

龍興幽泉中溶雲自潛飛氣還大淵下灰簷先察微氣

應不必邇至誠神與歸嗟予接休德志合無纖譏譬諸
死灰然安事旦夕違胡爲久相越書問月增稀

五言寄江丈鄰幾時往尉氏未還

終日相與居豈知相得懽出門一分袂乃覺攜手難西
風過浮雲急雨生早寒清秋令人悲茲游何當還歲月
游將晚念君尚加餐

寄深甫

往卜穎上居徒愛穎上人巢由節並世管鮑必相親而
我與夫子阡陌東西鄰正可白首遊豈計中道分人生

莫自必一別俄六春入踐西掖垣出乘兩朱輪佐時乏
明略來往徒紛紛上愧洗耳翁下慙圖霸臣念欲投劾
去結茅復從君攄我宿昔意寄聲謝水濱

寄湯忱明叔

君有湖海氣沆碭凌斗牛遠持一卷書濯我千歲憂大
音不衆合至寶非暗投感激移人心汎瀾使涕流俗譏
陳元龍世乏劉豫州安得排羣兒臥君百尺樓

雨中寄徐二

北風吹飛雨中夏變早寒浮雲滿天地坎井成波瀾秋

興集我懷旅愁散無端
 陽光旦自匿后土何得乾
 嗟君貧非病所寄瓢與
 簞陋卷無雜賓商歌激
 清彈甚願裹薄飯相從
 饜朝餐亦思造暘谷相
 與晞朝冠力弱泥潦深
 乃知行路難

論交

張陳父子游乃為白刃仇
 蕭曹平生歡亦作睚眦讎
 交合名利間安得無後憂
 商山有四人衰老俱白頭
 但食巖谷芝終身不相尤
 未必能獨賢苟云無他求
 古稱結交難成敗視此由
 作詩告同心市義誠足羞

秋霽醺北軒

北軒屬秋霽曉見風葉零
 置觴命賓友環坐飛淥醪
 適輒獻笑放言豁中局兀
 然不省醉起見天上星勉
 強相勸引我謠子宜聽幸
 無兵農憂稔歲蒙休寧讀
 書業文外惟有醉勿醒世
 途若波濤富貴乃浮萍置
 之無可稱視彼鴻冥冥

送楊十七祕丞知瀛州河間

洪濤翻金堤冀州變泥塗
 哀哉百萬室所憂半為魚
 流穴接道路呻吟交里閭
 若無慈仁長安使疲疹蘇
 子在

新密時治聲溢西都大水無麥禾閔然若疾痛不忍使
者求建言解其租邦人喜更生老幼歡以呼繩墨制奸
吏弦歌訓諸儒復新卓侯廟慕用已不誣今者河朔行
豈其易然乎彼將譽所試况子材有餘但恨治者小百
里爲區區割鷄用牛刀孔聖所歎吁賢者必愛民民活
心乃愉幼學長行之固爲聖人徒位下非所恤勉哉寧
君軀

送梁山軍徐祕丞

鷓鴣一何智俯仰人間遊落實不給視去之畏少留意

賢在天下富貴如雲浮得失不槩懷損益寧所憂若人
古已亡今復得徐侯詞科二十載朝籍方見收四海厭
名聲廟堂多輩儔後時不自失觀化君悠悠入辭未央
廷遠牧荒山陬去矣成獨往豈嫌時俗羞

東鄰花

卜居非卜鄰適幸鄰花發照曜東軒東暄然二三月露
香送清吹晨豔開繁雪稚子戲牆根鳴鷄出林樾我來
奔羈旅疑及武陵歇欲訪竟無從空觀對寥寂爲人情
俗事鄰里多謝絕獨爾可相親芬芳未應滅

公是集卷十五

公是集卷十六

七言古詩

憶洞庭

朱

劉

敞

撰

少年慷慨輕遠行出入楚越多所經每令百川盡衣帶
 獨憶岳陽觀洞庭方輿沈潛似無地倚蓋回還徒見星
 始疑上帝限南北恐有漏澤連青冥西風八月氛霧收
 曠宇千里令人醒苦為外境相誘掖欲棄塵世浮滄溟
 當時發狂頗自怪真擬乘興攜湘靈至今局促不如意

坐視歲月無時停涼秋滿眼更多感回首尚覺君山青

聞鴈

去年聞鴈江湖邊爾時異鄉望白雲今年鴈南身更北
可憐送目懷居人我生羈旅自南北鴈飛何為亦遠役
浮雲滿天我無翼相與因風寄消息

庭楸

中庭長楸百尺餘翠葉掩藹當四隅晨霞夕日自相翳
並坐可得千人俱憶昔河決鉅野溢定之方中作宮室
當時魯人始種此還賦衛風伐琴瑟春華亶亶六十年

高榦錯落摧寒烟悵望空隨衆木老中含至音無與宣

送張公往建溪

秋風駕流溪水急君帆胡為破烟入仙人近約武夷會
漢祀山頭羽旄立羣山叢叢野波綠君纓無塵見心曲
江淹夢筆靈有餘君歸何時佇盈軸

曉起

棲鳥未動清漏殘寥寥空堂生早寒相重樹色如潑墨
欲落月采成渥丹市聲嘈嘈入人耳自笑帶星還若此

防秋

秋霜折膠邊馬壯邊馬窺邊怒邊將游騎夜入燒回中
烽火朝傳過隴上關東行客關西來欲說兵形先啜哀
長戈不能斷右臂壯士無過委黃埃歲輸繒帛顧何益
匈奴反以馳荆棘安得連山如長城遍限中原卻蠻貊

打魚

南人登魚作臙臘清潭數里奔舟楫層冰始解川氣和
百尺分明見鬚鬣大網如雲遮要津須臾牽網迴水濱
地高勢蹙漸逼窄忽復逸出黃金鱗釣叟篙師共驚駭
失聲奪氣俱逡巡素魴赤鯉不足數棄擲千萬如埃塵
豈知異物通變化時暫網中還有神

戲題西湖中魚

育育水滿湖中有千金魚浮沈得意似太古不畏網罟
畏鵝鵝綠蒲欲齊藻初密紅尾差差映朝日疾雷驟雨
人莫知潛有蛟龍取之逸

養魚

鱉池不容數斛水養魚才勝十餘尾可憐出沒萍藻間
還如汎澹江湖裏君勿笑坳堂坎井無遠期假有神物
君不知風雲變化在倏忽隨衆幽潛聊爾爲

和永叔食糟民

歲豐飲酒衆同醉歲饑散糟民亦濟乃知酒醑在官爲
 長策上可足財下均利黃頭稚子白髮翁哺糟相隨塵
 土中豈嫌身居犬彘後還喜生值恩施豐翰林仙伯屈
 主諾憂民之憂樂民樂禍階六筭不易救惠及連城自
 云薄周公以來千百年希世俗儒玩糟粕排斥酒誥終
 莫用感激長謠豈虛作恨公未爲富民侯此等區區豈
 所憂

漁翁

白頭老翁披敗蓑求魚終日學淮波波深水闊望不絕
 網目雖繁能幾何大魚鱸鱠入淵底小魚鯁鯢登網裏
 手斲足趼吁可憐何不爲網大如天

苦雨

東風十日不肯回濃雲猛雨無時開紛然萬瓦垂組練
 忽變百里吹塵埃河魚無翼蹈平陸水鳥哺子升高臺
 羲和送日不竟夜陽烏翅濕方摧頽腐薪數吹不堪濕
 靈井已滿無用汲大衢泥潦安得出敗瓦漏缺端愁入
 街頭紅粟更騰踴歲晏做裘方綴緝黃花熒熒獨不憂

悵然爲爾臨風立

麻黃州送李斯石銘二十一字

麻侯昔爲萊子國海濱漁人獻文石云是秦始皇帝東
巡碑二十一字李斯迹桑田變海岸爲谷此石亦沈滄
海側浪翻水轉石段空偶存數尺非人力文章雖傳失
首尾猶與史記無差忒字形訛缺非昔時螿龍病虺相
排迨念昔屬車八十一氣如虎狼食中國方士獻策通
神仙諛臣奮筆夸功德始皇未死名已滅秦地初分石
皆泐邇來似覺天意然欲令後世羞其惑君不見夏禹

九鼎傳三王末年乃隨殷社亡時平往往暫一見龍文
玉鉉曾無傷聖賢作事宜萬代事非聖賢多立壞

畫草蟲扇子

周南草蟲但書興爾雅蟲魚浪多證豈如紈扇裂冰霜
畫出肖翹皆絕勝蠅讒蝶輕去蟪蛄狷同類殊名悉相
應毗陵老匠含天真獨得于心非氣孕犇牛落筆殊偶
然秦女驂鸞不相稱因君筆力尤天下一借微軀聞萬
乘

聽江十誦食鱸詩戲簡聖俞

長安貧客食無魚浩歌彈鋏歸來乎主人聆歌知客意
酌酒買魚相與醉一魚百金不可償操刀作鱠揮雪霜
鱗分肖解珠玉光舉盤引筋絲線長楚飯彫胡香且潔
吳羹入口如沃雪主歡賦詩客稱壽裂簡搖毫落寒月
我亦羈旅秋蕭條思鱸回首江漢遙過門大嚼取快意
詠詩忘味如聞韶君若乘風駕滄海更鱸長鯨且相待

積雪示張翁

冥冥同雲晝如墨十日江城雪三尺騏驥長鳴向朔風
鴻鴈悲飛困雙翼此時窮巷多泥塗念子衰年少筋力

時俗反稱少壯賢丈夫動與飢寒逼乘興能杖筇竹來
煮魚温酒澆胸臆

苦雪

積雪冥冥春不淹流光驟去十之三根拳枝拆物可念
衣敝履穿吾自堪天樞回環錯寒燠地軸開闔差朔南
乾坤密移世莫測安得辨士能劇談

雪夜留二二三客飲

高樓鼓絕昏鴉宿疎簾暗幕開明燭雪風振海夜未央
酒池無冰春更綠迎年送臘醉莫辭回環四序長相續

奉和聖俞春雪

一日朔風三日雪。冬來嚴凝春復結。不知長此終安窮。
 芳物差池且三月。雷公怒號何淬嗟。欲起草木呼龍蛇。
 可憐慘栗奪氣意。正復憔悴哀泥沙。紫宸放朝車馬息。
 鄰里謝交門徑寂。解龜換酒聊自樂。浮雲蔽日殊未極。
 同聖俞十二月十三日喜雪

楚越祆氛雜炎瘴。憑陵中州冬益壯。天兵橫厲江湖間。
 殺氣冥冥逐飛將。南風不競寒律回。暮雪遠從閩闔來。
 雲崩濤涌天地閉。掃洒萬里空塵埃。公卿入賀陛下聖。

海神來朝軍事定

和永叔喜雪

陰風觸物生。晚勁積雪經。旬戲春令。氣排水國。吁可駭。
 勢覆山城力。誰競續紛乍。逐飛霰奪慘淡。仰見浮雲定。
 稍并日夜明。相續欲亂立。黃色交映。丘陵迤邐增更高。
 市井喧卑聽逾靜。包荒含垢似天德。履素居純近民性。
 可憐佳境浩無極。非有雄辭豈能詠。忽憶避地歌其勇。
 攜手驅車及寬政。邇來盈尺亦何有。高臥閉門方自慶。
 矧占豐歲宜九穀。重抑驕陽敵百病。龍蛇在蟄鶯在谷。

與我俱欣四時正。新詩翩翩摧古人。汝陰太守明廷臣。俸色揣稱笑流俗。與民樂賡陽春曲。由來曲高和必寡。況我才居郢人下。

去年對雪一首贈江十

去年對雪本憶梅。今年看梅更憶雪。繁香清色他日時。誰為年年劇胡越。乃知古來人間世。十常八九不如意。況我與君羈旅人。別多會少誰復計。閒來看梅取一笑。對雪更作明年調。

月夜

清風卷雲天。雨霜衆星滅。沒月騰光紛。絃六幕含蒼蒼。瑩如冰壺察毫芒。太虛真人河漢旁。攀援桂枝曳霓裳。紫貝為闕白玉堂。珠筵瑤席羅羽觴。倚風微吟聲抑揚。揖我起游謂我臧。左驂蛟螭右鳳凰。倏忽萬里天路長。塵埃下土殊茫茫。樂如何其樂未央。

依韻和永叔即席送擇之出守陝府

驪駒在門且勿喧。主人留客姑進酒。一時轉盼已陳跡。千里相望更何有。祖侯聲名二十年。天下英豪共奔走。誰云白髮寄郎曹。更喜朱轡入吾手。揚雄天祿就寂寞。

召伯甘棠變枯朽。乃知人事不如意。自古十常有八九。
男兒何曾計出處。時運由來有奇偶。莫嫌青雲晚著鞭。
會取黃金大如斗。君能食飲和天倪。餘事無可付莊叟。

飛輪團扇歌

赤雲燒天天欲焚。深堂如炮井如饋。肴乾不食酒具陳。
君胡愁嗟念南熏。主人白羽奇且新。捷逾輅膏機有神。
飛廉舒御旋相奔。掩藹翕霍娛坐賓。衣襟飄飄恍凌雲。
何用御風絕埃塵。主人顧嗟顏色蠶。安得救暵通下民。
羊角扶搖非敢珍。願使大鵬離隱淪。上客捧觴起爲賀。

君宜千年位卿佐

雨過前軒偶記

江南羈客懷鄉壘。曉起前軒對零雨。清波滿目如鑑中。
遠岸高松十餘樹。砌旁芳草似汀洲。巉巖殿角飛紅樓。
沈光倒影入浪底。宛是若邪溪上頭。薄霧疎烟迷近遠。
水色誰能辨深淺。忽驚謝去塵中游。不知正自居京輦。
何人草服倚長松。迴頭誤問釣魚翁。眼前景致俱相同。
豈異仙術遊壺中。

贈才元學士

家貧自秣馬。賜書使者至。言之上。以語丞相。就職而拜。廣安守。

待詔先生窮巷居，簞瓢屢空方晏如。自操井臼秣羸馬，
初整衣冠迎賜書。王人駐車久嘆息，天子聞知動顏色。
飽死曾不及侏儒，牧民會肯輸筋力。詔書朝出蓬萊宮，
繡衣還鄉由上衷。君今已作二千石，亦復將爲第五公。

題梅尉春波亭

層欄壓湖春水碧，日照高穹同一色。東風引浪飛魚鱗，
極目傷心如禁澤。茫茫白芷連芰荷，倚沼畦瀛遙望多。
官賢與衆共其樂，漁樵日暮常經過。君家德祖吳門子，
棄職從仙如脫屣。此中吏隱人不知，且濯君纓洗君耳。

吳宮

吳兒飲鄭女，舞彩衣。妓服垂楚楚，姑蘇臺高春日遲。急
節新聲開鐘鼓，美人歡醉捧瑤爵。君王萬壽長如許，吳
宮四面盡山川。越兵那得到城下。

陰山女歌

接伴副使知制誥馬祐事

種玉不滿畦，種花易滿枝。王生寄石自有處，花飛隨風
那得知。嬋娟翠髮陰山女，能爲漢裝說漢語。春心未知
向誰是，夜彈琵琶淚如雨。赤車使者過鳳凰，閨中一聞
先斷腸。碧牕鎖烟未容去，侍兒密獻江南瑤。鵲飛上天

星沈海人心不同事隨改翦環洗妝許君老百年如夢
情終在妾乘油壁郎乘驄西陵松柏墨色濃新歡未已
舊愁起水流曲曲山重重周周銜羽鶴比翼天生相親
人豈識雖不及清路塵猶當作山上石

遷南行

甲申十二月桂陽叛蠻
平遷其種于京西諸郡

伏波將軍昔征南功業雖壯身不還曾出封疆鑄銅柱
竟留種族依荒山君不見如今聖天子埽蕩妖巢悉內
徙雕題來作冠帶民鼻飲翻宜伊洛水此功一成萬世
寧五嶺三苗長坦平

寄王二子直

鴻飛輒上天魚躍還入淵故人去我百里餘我欲附書
無由緣俗間離合誰得免心雖欲近身逾遠少壯相歡
長年悲自恨今爲丈夫淺

夜寄獻臣

同居汴水上自與君居隔月出城頭人盡歸思君攜手
獨不得興來狂歌無與賡白雲時向望中生城外明月
未應減期君對舉黃金觥

和永叔鳴鳩詩

晴鳩謹求雌雨鳩鬧逐婦天地有晴陰嗟爾何欣復何
怒柔柔如雲春暮時吳蠶半眠紫萁肥食不過數粒寢
不過一枝婦子相安可以老何用汲汲合且離雷公號
呼風伯舞天借之權作霖雨可憐汝愚終不省反室于
怒誰哀汝昔人惡爾巧今人笑爾拙巧不得近瑤臺拙
不能保家室爾巧爾拙非汝情天機回闔難自平世人
假爾推陰晴

秋蛩

促卽復促卽愁蛩一何力不見機杼巧但聞日夜織霜

隕木落天下寒嗟我婦子衣裳單大鈞萬物各有在爾
獨憔悴使人歎一鳴復一飛秋堂燕將歸四時自興歎
天道不得違憶昔春風和且柔畏人來入人間游鷹隼
橫厲自茲始索寞分散還可愁

三瑞堂

甘露被草朝陽易晞池蓮並蒂及秋變衰獨有長松連
理老益壯十年百年仍附枝昔來一物足爲瑞何況三
異俱稱奇吳中衣冠不勝數天意自與寧馨兒露乾蓮
死不復見正以青松并驗之凱風孝子嘗悲思三荆兄

弟傷分離此家遺風五十慕物理推類誰能欺到客爲
爾俱題詩

聞轆轤

轆轤復轆轤日夜聲相續長縷無已時深泉變空谷君
不見開闢至今千萬年斗樞坤軸相迴旋河漢西流亦
不息見爾滄海成桑田

過王氏弟兄

出城問窮僻負郭正瀟灑主人著書長閉關佳樹當門
宜繫馬下馬上堂還讀書新詩古琴雙起子昏鴉棲雞

欲斂翼與盡將去猶須臾徒見城中軒冕客不如吾人
一逢掖安得茅茨同里居子在東阡我南陌

同永叔贈沈博士

我不識醉翁亭又不聞醉翁吟但見醉翁詩愛彼絕境
逢良琴上多高峯下流泉後有芳草前茂林玄猿黃鶴
翩翩其悲鳴兮白雲翠靄倏忽而陽陰此間真意不可
盡未遇知者猶荒岑醉翁昔時逃世紛戀此醅酌遺朝
簪心雖獨醒迹彌晦舉俗莫得窺浮沈邇來十年定誰
覺獨沈夫子明其心寫之絲桐寄逸賞曲度寥落含高

深絕調衆耳多不省醉翁一聞能別音乃知精識自有
合何必相與凌崎嶽伯牙鍾子期目擊意已歆蓬萊三
山蕩析不可見惟有水仙之操傳至今安知後世萬千
歲此地不爲水火侵但存君詩與君曲雖遠猶可期登
臨沈夫子與醉翁斯言至悲君更尋

六月六日自城北還過深甫避暑

熱不就惡木枝渴不近盜泉水自古有成言念我還如
此愛君井源百尺深愛君庭樹千里陰相知豈計一飯
報長嘯聊爲猛虎吟

得蕭山書言吏民頗相信又言湘湖之奇及生子
名湘戲作此詩

吾家千里駒氣與齒俱壯去年射策雄東堂今年調官
在越上指揮小吏遣簿書笑語不廢才有餘清酒肥魚
宴賓客時時騎馬臨湘湖湖波無風百里平人道官心
如此清居民愛尹氏爲字
韓子爲縣百姓
生子皆字韓 令尹生兒
作名家祝君多男子越中更有餘山水

翦楸葉詞

涼風天際來拂我階前樹稍驚枝上禽復墮葉間露兒

童叟我逢秋，悲刻葉作花。矜歲時，祝我宜秋。勸使插木，能免俗復爾。爲鬢邊二毛，殊不惡。淮南何須傷木落。

寄書

十里一反顧，五里一徘徊。悠悠三千里，莫知我心哀。客愁紛無涯，歲月忽如擲。人生莫自料，皓首豈易測。節旄未落歸去來，天遣春風隨我回。入朝寧食建業水，還家卻賦南山雷。婦能秦聲妾趙舞，稚子可使行酒杯。急須爲樂娛，日夜何事憔悴淹。塵埃行矣乎歸去來。

答金陵使君答王待制見寄雜言

阮公青雲器，寓意必豪縱。西臨廣武寄一笑，英雄紛紛競如夢。有時不能平途窮，卽長慟。佳哉詠懷篇，千載共悲諷。金陵昔爲帝王居，氣象蕭索無復餘。長江連天水，東注臺城髣髴存。丘墟主人文章謫，仙老感古能無激。懷抱作亭正得山水勝，登臨更值風月好。賓客滿堂絲竹悲，古今風流自一時。君家夷吾雖有慷慨語，快意未必如君詩。淮水東流千萬年，此亭方與淮共傳。念君歸老廟堂上，未負賡歌留北山。

古城

古城何巍巍古墓何纍纍生遊市朝死田野從古到今
無免者城荒卻爲狐兔宅墓在他人種松柏伏羲以來
三萬年此城此墓幾變易誰人聽唱野田詩能令君悲
亦不悲

築室種樹

撫劍欲遠適舍旃輒復息四海廣大身正孤東西南北
頗同役築室種樹反開門閭里小人哀王孫丈夫委順
故任俗餘事悠悠何足論

風花

風花不自知高下逐風飛故有多情處時來點客衣仙
源應在晴溪側弄雪吹香不忍歸

種蓮

雨餘池上清且滿浮萍漂漂綠蒲短主人惜此芳意薄
移藕丁寧不辭遠南陂芙蓉少人識疊藥重房無俗格
託根得地今始逢西風白露爲君容

公是集卷十六

公是集卷十七

七言古詩

朱雲

宋 劉 敞 撰

志士不忘棄溝壑勇士不忘喪其元
 伏雞搏狸狗襲虎感激只在精神存
 漢朝陵替外戚盛五岳振蕩三辰昏
 臣強主弱上不悟庭中唯唯誰能言
 朱生節義滿金石面劾不避師傅尊
 願求上方斬馬劍誅一厲百清其源
 天威震怒不我受利刃接頸雷霆奔
 當前折檻色不變

命在頃刻誰扳援昔時仲尼魯司寇七日行戮端乾坤
嗟我此生心不就冥冥后土埋其冤漢家社稷變王氏
張禹虛蒙師保恩卓然先見在物表佞臣敗國誰復論
我願乘雲款天閭巫陽掌夢招其魂立朝蹇蹇辨邪正
無復奸諛開倖門

金山廡院

門前松響亂頭上壁上江圖流眼前松聲水響兩不辨
似有疑非心悠然安得乘興浮輕船

潘道士

上清宮中老道士曾從先皇去封祀山頭候夜窺火輪
汾上掇鈎出金耳雲成龍虎常翠華豐隆前導清泥沙
萬靈扶駕百神護雜沓仙侶堆雲霞黃衣羽客十有餘
多能引說軒轅初漢廷儒士議迂闊天子自用申公書
金繩玉策埋石壤神光夜見連空虛天心報貺宸意喜
白茅玉印旌其徒帷宮賜席接虎幄待之如賓盡誠慤
中書祕術使之觀神動精搖易飛躍鼎湖龍去何超越
日月茫茫自奄忽龍髯墮地秋草生人世霜華滿頭髮

過海舟

秦王好神仙東上琅琊臺蛾眉綠髮五千輩去乘長風
 款蓬萊此時秦人海旁立生別死分不敢泣但見高帆
 雲中沒野鳥悲鳴為翔集過海舟何時還火焚荆棘空
 驪山

猛虎行

陸不辭虎豹怒水不避蛟龍爭衆人亦有命大賢豈虛
 生千歲猶須臾四野如戶庭解弓掛扶桑脫劍倚太清
 騰身騎日月萬事如蚊蚋貧賤有固窮慷慨激中情炎
 火燉崑丘乃知白璧精雪霜沒衆草高松獨青青甯生

歌車下戚促兒女聲時至乘化遷運頽與物冥震雷不
 經聽芥蒂何足嬰君不見賈豎競錐刀蚍蜉利羶腥何
 如乘雲御氣遊咸池長嘯濯我冠與纓

雷陂勸耕作雜言

此陂蓋江都宮之地吳王鈞臺
 在其旁先時民三十家耕其中

後強為吏所奪廢不耕者十餘年矣予按地
 籍悉召還耕者使縣大夫授之地如其舊

君不見江都宮昔時何崔嵬下臨雷陂水前踞吳王臺
 臺傾無餘級水竭空塵埃隋人已曾顧此長嘆息今世
 更為隋人哀乃知天地間一盛亦一衰但從伏羲已來
 三十餘萬歲未有書契勝言哉堯桀是非何兩忘我欲

勸人闢草萊種稻水一方藝麻陵四頽爽鳩之樂非我
有聊獨玩此田莓莓未知百世間更復誰當來且欲及
閒從賓客省耕訪此時徘徊

碧瀾堂

茗溪之水搖空山雪溪波流無日閒上有高堂蔭華宇
蒼翠凌亂軒楹間異時客心樂真曠白鳥鷓鴣期往還
解纓敬枕便所適焉能復問居夷蠻嵐光稜稜聳屏幌
水響濫濫搖瓊環正如明鑑發塵匣萬象聚眼醒容顏
秋風已高白芷老編荷制蕙文爛斑魂魄清爽弄明月

洞庭跬步尋非艱神仙有無未可信物色但訝非人寰
瑤宮紫府竟何若茫然遠想令人潛長竿獨繭可以老
安用馳獵盧重鑲況復邦人講文墨風雅不待仲尼刪
丞相詞章狀元筆犖犖神裁無由攀嗟我胡然陷塵滓
不能追逐鷗白鷗發狂醉問二三子吳溪釣碣何如頑

陳丞相詩王狀
元書刻于石

濉陽歌

梁人猶爲濉陽歌隋人水調能相和梁人池臺已平地
隋人岸樹空嗟峨梁人隋人去如水水聲日夜流不已

張巡廟前春草生里人尚識將軍名國讎已滅心不死
憤氣半夜凌欃槍丈夫節義豈在下願爲長劍剗長鯨

馬蹄硯

巴巫之山足奇石氣含秋雲如黛色君家寶硯安所得
圓爲馬蹄瑩爲璧宛城路阻流沙長中國久絕真乘黃
惜哉逸足世不識所存一迹猶形相鄙夫雖非伯樂比
偶見裹蹄識千里願君不惜勤示人倘有驂騑免空死

天中山

茲山陂陀但盈尺其下盤根乃無極勇如共工莫可觸

力敵愚父無能役開闢以來傳至今形勢雖小當天心
斗極回旋未易測日影短長猶可尋石旁陰穴穿洞府
中有神物爲之主禱祠往往見光景曠早時時作霖雨
由來丘山貴靈不貴大正復陂陀亦何怪

岸旁倒樹

滄洲老樹生幾秋榦如黑龍根紫虬雨水摧激勢突兀
天矯出飲滄江流危不見持顛不扶蕭蕭生意令人愁
豈無耕夫與過客暫時憩爾行則休西風八月海水飛
枯槎昔曾凌斗牛恐爾漂零未終極掛帆欲去仍回頭

黃寺丞井上桐樹爲雷所擊

君家井泉深百尺上有高桐十尋碧鳳鳥不至獨何憂
蛟龍深潛莫能識迅雷烈風來擊時地軸翻倒海水飛
正直摧傷豈天意爨不成琴殊未遲

送人之會稽

鷹隼羞逐巢上雛騏驎恥隨殿中駒由來俊邁惡羈縻
子獨三年留上都江南秋風鱸魚美庖餽炊粳東入吳
腰間蘭佩垂左右船若神仙人不如會稽古來好風俗
巖助買臣相繼驅近來太守廷中臣拔賢好善當朝無

子今東去懷自許解榻非君尙誰與剋日飛聲動洛陽
聽君如聽雷門鼓

題深甫所種樹

中庭卻埽無餘地憐君種樹還有意重陰覆屋千尺時
徒坐讀書殊可喜似君秀骨不易攀當援桂枝星漢間
豈能玩此便自老塵俗紛紛聊閉關

雷氏子推迹石鼓爲隸古定聖俞作長詩敘之諸
公繼作予亦繼其後

結繩旣亡書契出文字變化尤倏忽太山七十有二代

遺事昏昏萬無一岐陽石鼓起晚周宣王之詩史籀筆
天下金石凡幾存此當爲甲彼皆乙體勢鳥迹雜蝌蚪
詞章車攻與吉日六書旣廢小雅缺能使兼存此其實
韓公昔嘗歌感激若弦周詩播琴瑟雷生今復隸古定
如破魯壁傳簡帙道之難行乃若茲二千年間能事畢
先王親用必貴本流俗玩文因喪質此雖于今似不急
豈不班班見儒術藏之天府自其所大訓河圖亦何物
會稽羣玉久冥寞漆簡韋編尚髣髴昔人雖死名不朽
智者能爲巧當述太學先生事起廢誦此勤勤救埋沒

會令永與天壤傳不比酒誥俄然失

城頭烏

城頭月出天正白衆鳥驚飛啼夜色枝高風多露新滴
畏聲惡影不能息愁人感之援鳴琴拂弦成聲淚沾襟
嗟爾一生八九雛游翔不過東西林白頭反哺無所恨
桓山分飛獨何心

驚鳥

北林風多丹葉稀棲鳥畏月夜中飛哀音亂發不自得
孤影屢翻無所依作巢欲高避彈射誰道通宵不能息

山深林遠去冥冥清露寒霜損毛翼

梅

江東梅樹江西客僻地相逢眼俱白雜花亂草鬪青春
玉樹瓊枝比顏色輕陰漠漠寒不返清雨高風且連夕
惜無白日照芳菲決雲之劍那能得忽憶曾過上林苑
五柞長楊心所識結根擢秀皆尋常得地翻宜帝王側
后皇嘉樹無遠邇爾生自合居南國勉留佳實和君羹
丁寧婦女無所摘

蒲萄

蒲萄本自涼州域漢使移根植中國涼州路絕無遺民
蒲萄更爲中國珍九月肅霜初熟時寶璫碌碌珠纍纍
東如玉醴甘如飴江南萍實聊等夷漢時曾用酒一斛
便能用得涼州牧漢薄涼州絕可怪今看涼州若天外

和道粹探春

去歲探花煩兩郎今年逢春情更長廣文主人似知我
一首新詩能發狂載酒可以過揚子肩輿不嫌干辟疆
東風老去甚容易百日醉倒我無妨

岳州引水詩

洞庭清波一千里城中釀酒常無水泥塗遠汲人共悲
餅缶屢空罍亦恥鑿井引竿高下流清泉泔泔六物修
邦人已息漢陰拙楚酒無復邯鄲憂誰謂機心有機械
大賢事業終除害

去年得澄心堂紙甚惜之輒爲一軸邀永叔首君
各賦一篇仍各自書藏以爲翫故先以七言題其

首

六朝文物江南多江南君臣玉樹歌擘牋弄翰春風裏
斲冰析玉作宮紙當時百金售一幅澄心堂中千萬軸

摛辭欲卷東海波乘興未盡南山竹樓船夜濟降幡出
龍驤將軍數軍實舳艫銜尾獻天子流落人間萬無一
我從故府得百枚憶昔繁麗今塵埃祕藏篋笥自矜玩
亦恐歲久空成灰後人聞名寧復得就令得之當不識
君能賦此哀江南寫示千秋永無極

題永叔白兔同貢甫作

梁王兔園三百里不聞有與雪霜比今公畜此安取之
瑩若寒玉無磷緇春秋書瑞不常有歷年曠世曾一偶
寧知彼非太陰魄鳳凰麒麟亦郊藪周南之人公腹心

張且肅肅橫中林獻全不損一毫末顧直肯計千鈞金
雕籠密檻回君寵初不驚人有時拱由來文采絕世必
見羈豈能隨衆碌碌自放原野爲

三清殿木槿

三清殿前木槿樹朝繁夜暗自相催晨光始出洛水上
暮雨又下雲陽臺仙姬神女衣服麗紫玉雜佩垂玫瑰
春餘衆木苦寥落況乃漸逼清秋來繁花滿目真可惜
稍稍萬片鋪蒼苔黃冠道士情意薄見似不見年年開
清風滿席車馬少莫與共賞傾金罍嘗疑壺中有仙術

安得升天繫白日

和吳九元會

漢家初成長樂宮亦以十月朝百工武夫崛起少儀節
秦制苟簡非王風猶云始知天子貴此甚可笑田舍翁
聖朝禮樂百年備文物寢盛兼義農月正元日古所用
數歲一講賓王公東至日出西太蒙南極丹穴北崆峒
重譯款關惟恐後奉琛薦幣無不恭太常調樂辨韶武
少府拭璧差桓躬旂常卷舒王路肅干羽出沒頑民從
協風入律效朔易瑞雪盈尺迎年豐陰慘陽舒變頃刻

天決地闢含冲融君看此等聖人事豈得復顧叔孫通
道旁擊壤九齡叟校室受書三尺童慣習昇平不自覺
豈悟帝力高無窮賴君作詩播英實如以鳴鼓祛昏聩
吾知朝廷億萬載與地侔富天比崇

荊州兒歌

都盧小兒歌且舞口吹鳴笛手擊鼓日落羣遊塵土中
噉咷不分巴與楚年年送臘迎春光家家相隨夜開戶
嗟汝兒曹舞更歌及爾不爲如老何

贈文顯

古來畫工著名者吳氏鬼神韓氏馬鬼神旣僞不足稱
狗馬空難亦多假顯師幼年獨寫人至今精絕疑有神
灑毫便覺面如面後素倏訝身觀身高冠長劔天子側
他時金聲復玉皆對之槃礴羸衆謂十常八九得
諸公固爲廊廟賢麒麟未畫宜私傳一丘一壑吾亦可
煩仗丹青無間然

戲作汎槎篇呈知府給事

君不見枯槎去時八月風海水自與天河通飄飄反出
扶桑上恍惚遍歷羣仙宮宮旁佳人瑩如玉邂逅相聚

歡不足詐言物外日月長正苦歸來光景促回頭稍與
煙霞隔世人空辨支磯石伯勞燕子東西飛惆悵中間
斷消息

春日作

天王城西金明池三月欲盡花菲菲遊人白馬黃金羈
駢驂結駟來金堤禁城恩波無遠邇清光面面均流水

賞閣後小桃同景純作

僕本山野之生民不堪刺促拘冠紳江湖自放老將至
豈悟歲月如馳輪謬隨多士貢王府浪得虛名通紫宸

遽從下列居第一當時頗似稱平津感激更思報天子
僂俛從事希涓塵濫書閩籍比朝舊驟上天祿均儒臣
省躬顧影每自愧譬如蒿艾參松筠未能引分拂衣往
正用飽食慙懸鶉太平中外雖少事賢哲馳騫猶辛勤
幸無官守逃吏責自可昏醉窮青春天桃花繁高倚樓
似若有意娛佳賓浩歌大笑忘檢局座客歡倒知吾真
東風瞥來能幾時況子東西南北人人間會合常苦少
擊鮮舉白毋羞貧林端啼鳩風雨夕異方相憶空酸辛

土牛行

立春自昔爲土牛古人設象今人愁豈有范泥作頭角
便可代天熙九疇村夫田婦初不知繽紛圍遶爭相祈
皆云宜蠶又宜穀拜跪滿前同致詞由來人事常反覆
久立麥津寧爾福請看今者拜跪徒少選分張取其肉
牛實無知何用祭牛能有情豈不媿化育萬物非爾才
世人資爾聊爲戲

胡九齡畫牛歌

書契已來有繪事畫牛著名今始二胡生戴氏雖異時
形似之間實兄弟鬼神易寫狗馬難古人舊語乃信然

不爾寥寥千萬年筆墨曠絕無比肩胡生曾畫百一牛
變態曲盡稱爲尤翰林主人題辭古四海文士歌賦優
俗情護前喜排後此事戴嵩未曾有會知誦玩無已時
畫與胡生俱不朽

同鄰幾觀中道家書畫

宋公好古天下聞法書奇畫多求真獨將文雅遺後世
官雖貴達家尤貧近自唐室遠及秦上下略數千餘春
丹青翰墨著名者一二收拾忘辛勤象賢濟美聲不墜
手澤鉅細皆如新朝廷交遊累千百未嘗肯示尋常人

公是集 卷七
蔡侯江翁與梅伯于今磊落稱絕倫退朝相從得盡見
更覺清門無雜賓鑿微賞異極毫髮四座若獲千金珍
往往發狂或大叫詠詩落筆爭紛綸我隨眾人久碌碌
學殖欲落衣生塵願登羣玉探禹穴不憚山海馳舟輪
此君家近未宜後率然欲往懷遠巡淹留祇覺歲月老
復恐異物潛通神但傳妙唱想絕蹟誦歎慷慨書指紳

西戎行

吾聞聖人之兵有不戰不戰之勝善之善況復良將握
天威西戎雖強安得擅憶昔屬國羽書聞中宴徹酒詔

圖勲丞相陳謀御史請獨可遣將誅其君吏民誑誤不
足治我以威德周無垠尚書侍郎盡明哲秉鉞載旆如
火烈羽林積卒明號令賊兵蹙威憂巢穴方春緩誅已
偷息天不假易行勦絕太常請獻象功舞史臣願勒西
山岳懸頭藁街救狂慢積粟金城撫疲茶西戎行告爾
勿逆果自坑百蠻來威天下平

題浙西新學

文翁昔時理蜀土能令蜀人似鄒魯范公今者臨江東
亦云教化似文翁文翁范公本同志蜀人吳人有冰異

蜀人之先自魚鳧不聞道德能過吳吳前泰伯後季札
禮讓繼爲天下帥迄今遺風未全滅得逢賢侯益昭晰
本之舊俗已相百泐乃磨礱皆俊傑當時文翁化蜀者
獨有揚雄及司馬後生可畏不可誣安知不在吳公下
吳人于今歌且仰我公去矣安所做願公上佐天王明
姬文孔術從茲行

戲金壺道士法墨走筆雜言寄鄰幾聖俞

狂鯨蕩海海逆潮巨鼇抃山山動搖疾雷勁風自相薄
潛鱗伏介俱不聊我無巨麴復藉糟無思遠人心怱怱

公是集卷十七

公是集卷十八

七言古詩

送劉涇州

宋

劉

敞

撰

劉侯之弓三百斤壯氣可以摧浮雲不忍區區事狐兔
自請治郡當邊塵天子外家異恩禮私廟舊鼎多功勳
少雖侍中貴省士匈奴宜避飛將軍憶昔汝南始相得
十年見君我髮白可憐日月如過翼我誠儒生猶恨惜
腰間寶刀手中策馳騫萬里須努力

種桐

東園芳樹盈百株四桐晚種皆丈餘不緣桃李鬪顏色
不爲琴瑟養肌膚霜秋要成萬葉子他日與致丹山雛
野人此意真不誣鳳鳥不至吾已夫

懷歸操二章

蟋蟀在堂歲云除今我不樂鬱以紆豈不懷歸畏簡書
蟋蟀在堂歲云逝今我不樂濡以滯豈不懷歸朋友畏

新灘行

憶昔秭歸之山崩震驚千里如雷霆江水逆流洞庭竭

至今蓄怒猶騰凌洄淵沈沈色如墨髣髴半露峯巒形
懸波一瀉三百仞魚鼈蛟龍俱不寧天公高居漏天隔
無故設險憂羣生時無伯禹真已矣坐念疏鑿何由能

靈椿館風折椿樹

野人獨愛靈椿館館前靈椿聳危榦風柔雨練三月餘
奕奕中庭蔭華傘清陰及物不自惜赤日當天損炎旱
危簷密牖清有餘翠竹猗桐何足算南山白虎嘯狂飈
孤根易動枝條散芳華寂寞未及衰萎遲遂比溝中斷
君不見月中紫桂天上榆有名無實安自如天河均潤

易生植甘露洒葉長扶疎結根得所應自貴庇蔭雖遠
真徒虛靈椿乎莊子浪叟誠爾徒爾當自取八千歲今
顛蹶矣人誰扶

觀林洪範禹貢山川圖

若昔文命熙帝虞大龜浮洛出元謨破山瀉澤魍魎走
四海砥定由天扶周推嬴仆亂疆理壁中但得司空書
先生始病學者惑爲畫盈尺山川圖職方輿地在眼下
地勢天文高下殊始驚六合可舒卷吾道指掌何難乎
先生當時持此藝欲以稽古開天意命乖時背竟何爲

于今傳者爲張宜宜生五十頭已白連蹇不爲州郡辟

朝廷何時舉行河合笑平當未精蹟

平當以經明禹貢舉行河

昨日風贈王舒

昨日風今日雨門前泥坑昨夜土秋懷慘悽誰最多江
南秀才洛下旅十年麻衣走南北飢寒不比倉中鼠悠
悠暖日庇重雲舉頭看天不得語

同承叔和介甫昭君曲

漢家離宮三十六宮中美女皆勝玉昭君更是第二人
自知等輩非其倫恥捐黃金買圖畫不道丹青能亂真

別君上馬空反顧朔風吹沙闊長路此時一見還動人
可憐怏怏使之去早知傾國難再得不信傍人端自誤
黃河入海能卻來昭君一去不復回青塚消摧人迹絕
惟有琵琶聲正哀

子直攜雜文見過

王孫少年敏于筆壯如驍騮勇鷗鷖搖毫裂簡殊多端
因事陳詞不專一春風吹空花滿眼秋霜縮物寒次骨
元氣回復無常形四時變化豈定律斯文法天亦自然
古來達者猶識偏今君始冠便如此後日更老當誰先

憶昔孟軻有遺語取之左右逢其源乃知述作繫根本
根本苟盛枝條繁君能致身取不朽後世知吾得賢友

戲題歐公廳前白鶴

歐云此鶴畏寒常于屋中棲之

明公雙鶴未易知志在赤霄萬里外低頭啄泥不目聊
拊翼向人幾可愛北風崩雲三尺雪側睨天池頗愁絕
不忍鳧鴨爭稻梁譏燕雀附炎熱答公厚意終一飛
萬人仰首公看之

大風

嘈嘈大風起朔方白日不沒天莽蒼洞庭彭蠡半飛洒

厚地圓天俱抑揚
鷗鵬變化不可測
風雲感會生羽翼
方春殺氣何時極
生物悲愁少顏色

同永叔哭聖俞

子真之後千餘年
人物寥落無幾傳
聖俞晚出江海壖
肩日自覺真神仙
仙氣如陽秋和以妍
文若河漢清且淵
大鈞匠物豈強鑄
飛黃絕塵寧俟鞭
名爲實賓道所捐
才與時選行苦遄
起草建禮衰可憐
掌教國子寒無氈
誰不富貴君重遷
誰不耄期君疾蹶
長松摧壑芝焚烟
誰其尸之當問天
遺草大小三千篇
白玉落落珠聯聯

此自可敵當世權物
莫兩大猶信然
我家江南再世前
與君通家情有連
見君總角今華顛
于我莫逆好已偏
今也已矣嗟絕弦
淚如翻波正淪漣
翰林文章日月懸
鑿石銘德埋九泉
上書立後祿紹先
分宅恤窮祭有田
嗚呼豈非天下賢
義不背死而苟焉
念子可以無悁悁
魯風二首時聞孔中丞卒

太山之雲朝觸石
清陰油油麗空碧
塵生東田禾麥槁
季女呼嗟待膏澤
比風吹空不成雨
中道無復見形迹
嗚呼天高誰問天
人今相說讒風伯

新甫之柏徂徠松結根高齊千仞峯天令爾生稟剛直
壽比王喬誰與同驚寔何時發巖底堅節青姿化爲燬
君不見蟠木但以左右爲先容能令人意尚奇詭

續楊十七輓蘇子美詩

吾聞蘇侯不及識內嘉孤雄世難得文如翻波氣龍虎
風雲晦明在頃刻中間流落似天意今雖暫困當永適
忽傳長逝旣已矣知與不知同歎息曩者避地金馬門
獻書著論驚上國材豪志劇少所有倏忽變化不可測
結交必皆天下士朝廷見人退自斥指揮功名力可取

城郭披露曾不惜廟堂諸公交口薦天子亦稱萬人敵
中道齟齬空歸來扁州東浮問損益登臨姑蘇睨滄海
憤歎始覺區中窄徉狂爛醉遺日月欲乘長風掛危席
安期洪崖殊髣髴蓬萊方壺定可陟浩歌秀句凌斗牛
至今紫氣猶融突若人不應逐物化吳中好事先已惑
邇來安知非形解世上蜉蝣限畛域遺編逸藁尚多有
但恐靈物隨變匿君當收拾藏永久毋以交情死生易

大雨行

日中驟雨海上來懸流滂沱正奔猛坳堂舊乾不濡足

公是集 卷六 大英舒帷披
回頭穿鑿成方井炎涼更代殊恍惚明晦回環不俄頃
地形天事無久長何況人情足馳騁君不見張耳陳餘
刎頸交中道相捐豈終永

錦繡溪行

金霞卷風漾清碧翠藻玉沙相歷歷旌旗不動蛟龍眠
空濛錦繡張春色五紋婉轉沈吟香時時飛出雙鴛鴦
笑窺貝闕倚瑤瑟金華射天高下光海近蓬萊卻清淺
星客浮槎莫輕返齋房幾日饜華芝瑤席香殘舞燕歸
錦繡溪邊春幾許欲尋清淺醉芳菲

送鄰幾之官兼遊天台四明見于詩中

蓬萊謫仙頭半白搖搖去爲江南客長風醉送浮海航
宿雨自蠟登山屐山海使人行易迷君雖吏隱歸何時
若攀琪樹亦相憶三鳥飛來寄消息

裛信新蔡兩令言飛蝗所過有大鳥如鶴數千爲
羣啄食皆盡幕府從事往按視如言因作短歌記
其實

廣州奇禽鴻鵠羣勁羽長翼飛蔽雲嘯儔命侶自其職
飲水棲林餘不聞今年飛蝗起東國所過田疇畏蠶食

神假之手天誘衷此鳥乃能去螟賊數十百千如合圍
搜原剔藪無孑遺歷尋古記未曾有細察物理尤應稀
憶昔虞舜德動天象爲耕地鳥耘田聖時多瑞亦宜爾
請學春秋書有年

月夜聞唱歌

滿城明月中宵白淮南唱歌如淮北春風忽起高入雲
餘聲卻下盤阡陌南音俚出自相知時復一笑情熙熙
誰道幽蘭白雪好只見獨謠應獨悲

寄楊彥文

楊窮居吳中予與楊友
貧無以贖作此見志

高冠長劔非一賢子獨困窮情可憐差池早爲後曹掾
坎軻復就東山眠昔者結交則白首邇來傾蓋凡幾年
窮轍決江竟寥闊縕袍共做無山緣人生出處不如意
自古富貴皆由天天門九重不可問咄嗟拊髀心拳拳

寄范十九

君毋走馬君竟走走馬蹶塊傷君手蹭蹬翻成折臂翁
世間肯要三公否西郊敵騎非常壯年年犯邊殺邊將
勁弓長劔如君徒始堪追逐青海上功名棄置時未可
意氣激昂人所望側身萬里風雪寒無由贈子黃金丹

劉涇州以所得李士衡觀察家寶硯相示與聖俞

玉汝同觀戲作此歌

李侯寶硯劉侯得上有刺史李元刻云是天寶八年冬
端州東溪靈卵石我語二客此不然天寶稱載不稱年
刺史為守州為郡此獨云爾奚所傳兩君盧胡為絕倒
嗟爾于人幾為寶萬事售偽必眩真此固區區無足道

和府公觀劉團練寶刀詩

此刀新羅所貢上以劉正先為玳瑁錄瑋制作

絕巧也

吾宗寶刀清如水東夷昔時獻天子孤光晝射滄海寒

殺聲夜吼蛟龍起上為錄瑋下玳瑁粲如珠璣耀朝日
制度還存三代風精神未是塵中物祕藏武庫人莫窺
外家將軍獨得之四方昇平竟未試流落功名翻可悲
時無薛燭誰賞異廟堂宗工詩絕世丈夫要取萬里侯
肯令神兵負詩意

與聖俞君章樞言持國飲因以太公大刀王莽錯

刀示之

大刀長五寸半闊一寸正為刀形鑄作絕精巧其面有古文三字上一字可曉曰齊

下二字不可曉其背為圓法錯刀長二寸厚四分

金錯篆文兩字上曰一下曰刀又其下曰平五千沂州民鑿地破古塚獲之各數十百枚雅為好事者購取王公和守沂州求得數枚以其一遺予

君不見九府圖法傾東鄰齊公大刀又日新君不見黃
 牛白腹蕩滄海亡新錯刀忽遽改一盈一虛更質遷勢
 如流波不復還邇來上下各千歲自太公至新室千歲
自新室至今亦千歲
 何異俛仰須臾間王伯之事自存一況此錢刀握中物
 愚智共盡令人悲興廢相尋空史筆前有一樽酒浩歌
 為君壽君能識此當日醉身世悠悠復何有

往年築青澗城各有得佩刀者莫知其何世物余
 按故史則赫連勃勃所鑄也所謂大夏龍雀者是
 矣客因以遺予為作七言詩

赫連寶刀利且堅霜鱗錯落龍雀環當時鑄作妙一
 赫赫似與天相連雷公祝融借光彩蓬飛中原鯨振海
 神物羞為不義屈一去人間向千載蛟蟠虎化自有時
 氣如投蜺世莫知力能提攜倚天外一掃雲霧君看之

寒林石屏風

屏風畫山皆任假寒林石屏自然者蒼紋紺脈亂交加
 短樹高枝自瀟洒觀者寧分畫與非但怪奇妙非人為
 又疑古苔著石瘦何得本末無纖遺桑川變海松柏死
 寒暑不及榮枯期佳哉大鈞育羣類埏鎔精巧無巨細

天真通貌皆生成俗師筆墨那形似居人幽獨最相宜
樸厚遠謝雕鏤姿城中雲母屏更好慎勿浪示豪家兒

秋園行

空園過霜無餘絳。上有梧楸下蘭菊。疎陰雖存不自蔽。
殘香已斷誰更續。憶昔繁華今九秋。天時人事略相侷。
放懷未能驚物化。爛醉聊可為君謀。

槐陰

都城廣陌如綺分。綠槐左右結浮雲。火輪東升又西沒。
倒影參差朝復曛。輕車重馬誰家子。側肩相逢密如蟻。

共看擇蔭須臾間。可憐爭道尋常裏。下有溝水日夜流。
年華視此俱悠悠。

春陰

楚山春陰誰復數。朝朝出雲暮暮雨。高唐恍惚信有神。
晦明代謝今猶古。蜀江渺渺水東流。苦霧淒雨翻似秋。
日月高懸不可遇。眼看卑濕令人愁。

桃源

武陵谿水清無塵。武陵桃樹花長春。會買漁舟謝賓客。
來作武陵山下人。秦人洞府晉人谿。碧草紅桃處處迷。

流水至今堪悵望問津從古失端倪山川非復壺中見
雞犬猶傳雲外啼顧視人間真敝屣爲煩仙子託幽棲

和承叔十二韻

次韻

愛公猶愛屋上烏何況公家手種菊憶昔重陽醉共賞
已落紗帽歡不足誰令繁霜逼芳意坐使嚴風卷餘馥
主人于此情不淺上客方來強令束馬聲玲瓏搖玉環
屢綦參差破苔綠重尋荒徑憶五柳因咏東籬憩茅屋
已憐歸鳥有真意更覺晨風傷局促引杯大酌傾玉壺
擊節應非響喬木物華瞬息暫入夢世事蚊虻一過目

浮丘接袂當鳳舉俗士歌驪真狗曲衣冠頃來塵土變
形貌今者毛髮禿公詩乃使我忘老逸調何由能繼屬

共城寄仲弟

共城稻秧如黍禾共城木少種竹多熟聞邇來風土美
貧無置錫知奈何百門蒼翠太行麓百泉清泠淇水澳
長安宦遊跬步到隱居鷄黍終年足人生早念少游言
燕頤莫矜飛食肉卽今囊空未果歸且爲黎侯歌式微
寄聲好在久良苦異時自檝來迎汝

田家行

春耕高原不辭苦晚歲離離滿百畝豈知輸稻如輸金
始信種田虛誦黍持黍易金入市行粳稻踴貴黍價輕
十鍾一石亦不憚三時力農空自驚去年歲荒食半菽
今年歲豐彌不足物理悠悠難豫謀誰謂豐荒略相覆

荒田行

大農棄田避征役小農挈家就兵籍良田茫茫少耕者
秋來雨止生荆棘縣官募兵有著令募兵如率官有慶
從今無復官勸農還逐魚鹽作亡命

戲作青蘘香毬歌

藍田仙人採寒玉藍光照人瑩如燭蟾肪淬刀昆吾石
信手鑄花何委曲濛濛夜氣清且嫋玉縷噴香如紫霧
天明人起朝雲飛秀鬢疑成此中去

櫻桃花開留徐二飲

晨暉照屋清露晞櫻桃花房開欲齊繁花先得造物巧
不與衆卉爭高低參差萼萼相照耀恍惚滿眼令人迷
鳥驚風過若無意雲起雪飛空滿蹊仰攀濃香俯玩影
應接不暇昏鴉棲流光易失動壯士斗酒相勞和天倪
浩歌直欲并日夜醉耳不能分鼓聾人間出處未嘗定

暫雖會合終當睽子今躍馬至萬里脫略塵土排雲霓
豫知明年花復發悵望君子無由攜少年且作後日意
更使封植驚淮西

萬卷生

白頭書生南國賢讀書萬卷夜忘眠陋巷簞瓢未曾飽
苦心獨行意誰憐緡經遍窮十二等陳力負過三千年
莫笑青袍學士老太平能頌連中弦

公是集卷十八

公是集卷十九

宋

劉

敞

撰

五言律詩

野望

重陽去寥落小雪碧蒼茫獸起駭枯草鳥歸橫夕陽薄
雲低引白衰菊暗消黃佇立何為久愴人非故鄉

燕城閒望二首

幽尋古城上秋景日悽悽落照映原沒陰蟲當路啼隋
宮變蕪蔓楚分失端倪自是傷亡國非關醉眼迷

春草忽更綠。荒城陰霧滋。風存鮑昭賦。秋益宋生悲。慨
想秦兵出。傳聞羽檄馳。江湖歲將晚。空羨逐鷗夷。

夏晚

閏餘時候早。夏晚似新秋月。出空堂。靜蟬鳴深樹。幽健
逢鷹學習喜。見火傾流早晚涼。鷗起重修白羽裘。

聽鐘

陋巷客回轍。夕陽鐘送秋。寒聲滿空谷。暝色下高樓。陡
逐悲風起。微兼遠角收。旅懷傷急景。聽此魄淹留。

野望

江水不可越。扁舟浮夕陽。高秋露寥落。遠樹出毫芒。澗
水清兼濁。山苗綠映黃。漁翁豈招隱。何待唱滄浪。

觀南戍士卒作樂

簫鼓軍中樂。旌旗歲晚過。激昂雙劍舞。慷慨萬人歌。睥
睨荆衡小。騰凌虎兕多。北風隨殺氣。橫絕洞庭波。

聞聖俞移官雪上以便歸養

親老不擇祿。此心如古人。戴星捐吏事。戲綵過鄉鄰。若
下開新酌。汀邊詠白蘋。醉吟俱入手。亦未負青春。

西域請平三首

西域請都護。崆峒獻凱歌。兩階增羽籥。萬里肅山河。甲
 第旃裘少。春宮苜蓿多。雌雄雙匣劍。棄置欲如何。
 禦戎傳上策。不戰屈人兵。遂斷祁連臂。何須萬里城。出
 車非遠略。高枕得昇平。戰骨翻空死。吁嗟壯士名。
 單于貪漢物。自古號天驕。賜予金銀貴。行來玉帛遙。悲
 傷買太傅。慷慨霍嫖姚。慟哭辭新第。英雄未可招。

雪後登觀風樓

雪帶郊原闊。城橫碧玉齊。夕陽寒似落。遠樹望如迷。旅
 鴈情更急。棲鳥飢亂啼。強歌非郢客。竟日戀危梯。

開竹下小逕招君章

翠竹生無數。蕭蕭一徑新。陰繁催短日。地僻斷飛塵。磐
 石兼容客。幽禽不避人。君能爛漫醉。當及七賢真。

贈刁十八自蜀還鄉昔與此君別于福唐

瘴海三年別。巴山萬里迷。相逢忻邂逅。卽事恨睽攜。夢
 滅清江外。愁寬太白西。知君偃鄉墅。已忘子規啼。

送李監丞致仕還鄉

前漳州縣尉

耄期吏隱倦。歸去上恩榮。國子瞻師保。鄉人慶父兄。揮
 金慰游舊。擊壤傲昇平。遠笑吳門叟。何爲變姓名。

懷陳州舊居所種桐寄黃翁

忽憶南軒樹。春風空復來。陳亡韶已矣。孔老鳳悠哉。不作溝中鱖。應隨爨下灰。舊居阡陌並。君到為徘徊。

荷華

水國非人境。芙蓉五月秋。亂香清宿醉。濃豔破征愁。魚戲都堪數。鷗飛絕自由。會須窮一賞。詰曲任扁舟。

七月二日

西風入庭樹。天氣颯然秋。細雨纔成潤。高雲淡不流。平分感一葉。遠興憶扁舟。蟋蟀何須急。羈人始欲留。

秋雨所居漏濕

皇天不愛物。風雨害秋成。未恨泥塗辱。端憂柱石傾。淹留驚歲晏。堅臥悵雞鳴。吾道還如此。商歌天未明。

秋雨

采蕭逼晚歲。飛雨度高雲。暝色空牕見。秋聲墜葉聞。過螢低似滅。遠岫望如分。蟋蟀悲虛織。輕絲競欲焚。

始涼

北風吹過雨。晚景留新秋。高臥來一笑。如焚寬百憂。精神露鷹隼。意氣激驂騑。自覺亦飛動。江湖思遠遊。

八月旦始涼

騷騷北風急。杳杳白雲飛。江漢波新起。蒹葭露欲晞。狂歌聞鳳鳥。楚製見荷衣。歷歷先賢趣。南浮亦庶幾。

重到謝氏園亭寄裴博士俊叔王主簿宗傑

時裴往淮

南王詣京師

徘徊遠林下。幽草為誰芳。前日同遊客。今朝俱異鄉。東風雖淡蕩。陳迹似淒涼。何用江千里。春心故易傷。

送晁殿丞僉判鄭州

世德緇衣美。天倫玉樹溫。于君如舊識。曾子欲奚言。東

里賢能宅。成臯戰伐原。從容訪耆老。遺蹟尚多存。

檀州正月二日

窮谷回看盡。孤城平望遙。自古北口山至此都盡市聲衙日集。州

衛日集海葢每且海氣如霧至午消盡土人謂之海葢冠帶才通漢山

川更入遼。春風解冰雪。最覺馬蹄驕。

雨中聞鐘

疎鐘不隔雨。迢遞入重城。倦客未能寐。歸禽初不驚。霏微通暮色。颯沓隱秋聲。簾幕鮮風起。明朝應早晴。

珍簞

珍簋平鋪水珠簾半捲風勞生高枕裏多事劇棋中性
僻非朝隱民淳賴歲豐倏然對松菊但覺訟庭空

蟬

微軀定誰恨清嘯不知勞屈宋悲秋苦夷齊臥隱高風
林含咽絕露葉動蕭騷何必催搖落人今已二毛

臨雨亭

秋至感人思登臨成惘然浮雲帝鄉外落日古城邊歸
鴈聲相別幽花色可憐名山負獨往觸物見徂年

同梅二十五飲永叔家觀所抄集近事

陶公一畝宅尤愛北牕風心遠地成僻客來樽不空觀
書太史氏全性市門翁予亦何為者于茲清賞同

伏波

伏波志慷慨南涉武溪深銅柱功一跌壺頭悲至今吾
聞威四海亦有失前禽試察兩階舞應如丹浦心

客有遺予注輦國鸚鵡素服黃冠語音甚清慧此
國在海西距中州四十一萬里舟行半道過西王
母三年乃達番禺也

四十萬里外孤州天與鄰應誇王母使更遇越裳人素

質宜姑射。黃冠即羽民。那將籠禽比。蕭灑絕埃塵。

九月十四日于雍熙院為舅氏齋設作

他時傷遠別。渭北遽成悲。今作終天恨。悠悠奈我思。平生華屋處。回首不勝悲。寂寞西州路。何堪再到時。

晦日

是月佳遊勝。茲辰舊俗同。會須陶一醉。相與送諸窮。江柳參差綠。林花點染紅。春期猶大半。作意競東風。

新蟬

五月微陰始。鳴蟬高樹幽。倚風偏送曉。迎露欲先秋。孤

管清兼濁。么絃斷復留。年華自當爾。羈客浪多愁。

和江學士聞蟬

微陰變潛律。濃霧引疎音。時化能無感。清吟獨有心。蕭條映落日。斷續響中林。秋風忽滿眼。嘆息歲華深。

寄隱直

避人非故土。帶郭喜幽居。淺俗情多畏。新知意尚疎。負暄勝構火。汲井足滋蔬。二物關身外。悠悠謝里閭。

寄袁陟

與陟去年內夏初相見時陟自蜀山下南郡

巫峽行雲外。春江落日邊。隔年雞黍具。萬里孝廉船。遠

道比何若相思長渺然郢中輕白雪逸響待君傳

寄范佑之時病似狂

吾子世罕識他時醒亦狂由來韻高逸固自得軒昂阮籍哭道路接與歌鳳凰之人亦豈病相嘆不能忘

寄王二十

累累煩書札悠悠感別離平生義繾綣相憶路逶迤羈旅老將至江湖天一涯佯狂人事絕乘興爾難期

寄蘇州張六

西風入簾幕游子念江湖丹橘垂珠寶肥魚薦玉腴他

時肯招隱快意欲乘桴物色煩相候佯狂興不無

寄隱直時寓汝州僧舍予亦居輦寺

俱為異鄉客似伴老僧禪虛室矜生白時流笑草玄歲寒差自若生理直儻然無術能乘興蒼茫欲雪天

寄張獻臣

締交從若水百里絕相遇平日相離索期年見揣摩從容席上客清絕郢中歌擬屬陽春和伊予獨在適

寄張晉卿時棄官還家

聞道新安尉清羸只自如歸來陶令賦養性子真書情

在交遊厚心于仕進疎人憂棄妻子獨入剡中居

寄范佑之

范子三年別長安北望深相知非勢利寄信各浮沈勇
銳百夫敵軒昂萬里心何時殺羣賊自取肘邊金

寄梅山陰

縣與吳門近。居家識舊游。山回江表盡。水入鑑中流。勝
事皆高古。詩懷易滿眸。春風花又發。能寄北人不。

寄蘇頌兄弟

秋風生眼前。客子思悠然。羈旅獨無友。別離私自憐。賦

甘僧父誚詩許俗人傳他日梁王客偏懷太子賢

寄因甫

昔別大梁下至今三歲餘豈無萬里使不寄一行書風
俗與時薄交游于義疎知君淡如水非是故忘予

寄張仲謀

張也真吾友今年見老成自彊雖不息積習亦諸兄曲
講聞師譽題詩使客驚莫如班定遠投筆笑諸生

和直孺夜涼

急雨逐雲過微風吹月生寥寥天宇阔粲粲葛衣輕展

轉漏將永昭。回河正橫秋。槎舊有信。忽憶汎滄瀛。

送婺州王學士

春草碧將歇。江南鶯亂飛。王孫去有適。綵服粲生輝。古
郡富山水。斯人歌海沂。惟應布寬詔。談笑樹風徽。

素屏

簡拙違時好。丹青謝爾工。坐看居士室。想見古人風。當
戶月常入。過春霜未融。物情忌太白。少自晦塵中。

城樓望春

高樓新雪後。春意已端倪。遶石泉聲急。圍城柳色齊。滯

流貪適興。幽僻嬾招攜。舊種桃千樹。春遊豫恐迷。桃谷在樓下

送邵武張學士

待詔勤穿履。承明厭直廬。一麾從此去。千騎上頭居。歲
事畬田早。風謠鳩舌餘。班春急乘傳。知不為鱸魚。

野思

野色行行遠。春輝樹樹繁。看花頻落帽。聽鳥久忘言。遣
興惟詩句。閒懷獨酒樽。誰能顧名利。終歲不窺園。

訪楊異寺丞

楊所居在城外甚多雅致

三徑向松菊始疑元亮居但多柳五樹復對隼雙嶼相識是傾蓋劇談能起予樵蘇不用爨耳目且清虛

楊新得鬱

州君

黃寺丞風雨中見過

節物重陽晚風雲萬里陰君來慰孤憤語次豁愁心名下如舊識人閒仍陸沈獨醒感庭菊蕭索萬黃金

送洛南周寺丞

不知商洛道空慕紫芝歌從事老將至送君情獨多雙鳧尚方去駟馬故鄉過想見揮弦樂春風初扇和

弔南宜守尉

百越誰生禍南宜遂不師干戈傷耆老守尉死城陴荒洞招魂遠官軍請救遲弱妻攜稚子嗟爾欲何之

弔亡卒

厲俗侵王略祆冤積楚氛民荒誰念亂功敗失圖勳天子憂南土戈船促大軍何時收爾骨委祭越江濱

和楊備國博弔屈原

知音不恨遠異代或同聲靈魂自識路幽遇亦含情淮記屬揚子臨洲悲賈生高文激頽俗曾使眾人清

楊前歲夢

中作詩後數月詔除歸守既署事過謁屈平祠想見物色如夢中所覩作文祭之刻之寸石

聞夏太尉自長安徙備西邊

防秋未得還。戰士出長安。地利山河險。天時關塞寒。羌夷避飛將。天子倚良翰。見說成功近。秦中意似寬。

三月四日上方寺送隨州十一屯田

載酒憐春盡。尋芳到翠微。絲絲芳草遠。颺颺雜花飛。俯仰悲陳迹。淹留恨落暉。青楓千里目。那復送將歸。

嘯臺

尚有高臺在。遺名幸未空。不時嗟眼白。失所念途窮。已

矣先生意。蕭然烈士風。清芬定誰嗣。漫嘯白雲中。

日晚野步過孫監丞

幽居巷南北。雞犬略相聞。乘興偶有適。杖藜聊復勤。高城秋草落。密樹夕光曛。微爾開三徑。悠悠麋鹿羣。

浮舟西陽池中

愛水都成癖。浮舟不厭頻。寒泉清見底。剝木略容人。故故乘流往。飄飄得意真。槎頭尺許地。鷗鳥欲相馴。

乏酒

搖落偏悲客。清寒易中人。寂寥那自守。淡泊亦殊真。浮

俗仍皆醉。虛談浪飲醇。高歌傲燕市。忽憶重千鈞。

西戎乞降

南國傳消息。西戎送好音。懷柔知帝力。啟佑亦天心。御酒葡萄遠。離宮苜蓿深。仍聞編舊里。五嶽望君臨。

壽山

中京南云多老人往往百餘歲

白隰見層峯

白隰即中京

巉巖倚碧空。上多千歲木。下有白

年翁。樂社不材。永東陵。非義終。

太史公云盜跖日殺不辜。竟以壽終。吾聞

仁且壽。故在太平中。

爾雅距齊州以東至日出為太平。太平之人仁也。

山寺

野竹檀欒翠。孤峯杳靄青。山樓隨詠曲。石路上青冥。雲色移時合。鐘聲隔水聽。似聞堪避世。遊子未嘗經。

城南泛舟三首

乘興隨所適。出郊聊汎然。清波能照髮。白鷺巧迎船。老樹悲秋雨。高風急暮蟬。孤城隱不見。落日暝浮烟。不踏城南陌。從春及素秋。蕭條非復昔。顧眄莽堪愁。白露蒹葭老。清風蘭杜幽。伴狂驚楚俗。應識棹夷猶。高岸看為谷。涌波幾覆城。檣巢非太古。野俗競偷生。雨逐行雲過。山依返照明。楚歌搖落際。更動北歸情。

敦除蘇州掾

三年不相見。萬里比何如。聞道詞曹掾。新承選部書。弓裘傳習在。簪笏抗塵初。努力人間世。毋為薄詔除。初任

鎖廳及第思亦修進士業皆在蘇州故略見意第五句中

黃州臨臯亭

春秋黃子國。楚越穆陵關。比屋皆編竹。孤城半踐山。岸泥觀虎迹。雲水暗荆蠻。三入承明客。那能鬢不斑。

暴雨

山晚雲霧合。江秋風雨多。馮夷何事舞。楚水忽翻波。黯

黯夕陽盡。翩翩暮鳥過。怪舟送兩槳。聞唱石城歌。

驟雨

炎日大冶沸。清風愁意蘇。黑雲過山岳。白雨覆江湖。彷彿鬼神戰。騰凌車騎趨。森然異氣象。真復慰泥塗。

夏夜暴雨

大暑積炎夏。沈陰昏楚天。疾雷五河裂。飛電萬星懸。漲澤通南國。孤城鬪百川。似傳黃鳥語。欲反濯龍淵。

久雨

祗憶風回雪。俄驚地出雷。沈陰連甲子。春事總歸來。湖

水寒侵夜江雲去復回。開年厭卑濕。不待熟黃梅。

久雨二首

江雨黃梅實。湖雲起蟄龍。寒生夜牀簟。聲絕暮山鐘。藥
裹添新粉。書編圻舊縫。雖知恨卑濕。涼夜尚吾容。
頗憶家居日。朝眠一事無。邇來趨幕府。曙雨踏泥塗。城
郭飛鳴鶴。階除戲浴鳧。秋風殊不遠。行欲問江鱸。

茶山送道粹

海上相逢少。山中別恨多。浮雲自向闕。秋水更增波。攜
手意不盡。班荆情若何。徘徊強一醉。且勿奏驪歌。

招晉卿時晉卿到丹陽

識心非識面。常恨不相從。那作經年別。曾無一日逢。興
來清剡雪。吟出暮山峯。淨埽門前路。期君馬繫松。

女郎臺

城郭臨湖盡。樓臺此地偏。動搖浮積水。高絕近諸天。應
接都無暇。虛空足悟禪。塵中故易厭。興盡惜回船。

閔雨

風伯曾何憾。高雲不少留。聲如鬼神過。勢卷日星浮。河
漢漠無象。魚龍方自憂。古書難盡信。雩舞竟悠悠。

砧婦

清霜石上乾。孤響耳中酸。歲逼秋芳盡。風量板屋寒。君行自悠遠。妾意亦艱難。此夜關山月。應知帶日寬。

李太傅輓詞三首

數聞伏閣議。屢上薦賢書。任重道空遠。名榮身反疎。異鄉悲鵬鳥。清詔隔公車。招隱真虛語。江湖萬里餘。漢清詔使
以故大夫為之
報國念推轂。逢憂甘噉臍。孤鳴一垂翅。舉俗競吹齏。山鬼離居遠。靈魂識路迷。天高不可問。愁意日淒淒。

識理未曾誤。疾邪惟過深。豈忘事反覆。不忍俗浮沈。去

國尚回顧。埋名方自今。異時山水意。惻惻弔鳴琴。予殿試

文特為君激賞署天
下第一議者乃皆決

魯拾遺輓詞二首 君晉初狀元及第
至其曾孫始葬

市朝非故日。年代屬傳聞。始兆滕公室。來觀季子墳。埋名書故事。編簡屬遺文。苦恨相如賦。俱隨諫草焚。

西晉登賢日。東堂第一人。競推天下士。爭辟幕中賓。故國無喬木。流風及搢紳。新阡廣陵上。荒草欲含春。

庶幾堂

閉門吾自足。況亦近墻東。滴滴階鳴雨。梢梢竹過風。綠苔侵杖履。秋色近梧桐。高臥殊多興。詩成寂寞中。

晝寢

自注云甲子四月十七日午時作據甲子為元豐七年公是年屬疾奏乞以宅為寺疾

愈懶居城中

井逕從蕪漫。青藜亦倦扶。百年惟有且。萬事總無如。詩

艾匪且有且注且此也楚志出家白首而歸鄰人見之曰昔尚存乎楚志曰吾猶如也昔人非昔也乘

置蕉中鹿

列子穆王篇鄭人有薪于野者遇駭鹿擊而斃之恐人見之也遽而藏之隍中覆之以蕉

不勝其喜俄而遺其所藏之處遂以為夢焉順塗而詠其事旁人有聞者用其言而取之既歸告其室人曰向

薪者夢得鹿而不知其處吾今得之彼直真夢者矣室人曰若將是夢見薪者之得鹿耶詎有薪者耶今真得

鹿是若夢之具耶夫曰吾據驅除屋上鳥也此掃除外累得鹿何用知彼夢我夢耶

愛其人者兼屋上之鳥杜詩獨眠牕日午往往夢華胥

主人屋上鳥人好鳥亦好

列子黃帝篇帝退而閒居大庭之館齋心服形三月不親政晝寢而夢遊于華胥氏之國

延州沈待制轅詞

詩書謀國體談笑卻邊塵已矣今成昔歸來悲故人餘

忠焚諫草遺恨畫麒麟禁角聞鼙鼓能無憶虎臣

祠部王郎中送山水枕屏作

枕上萬峯合蒼蒼驚夢魂如浮武陵水臥向桃花源杖

屨幾時士茅茨何處村悠然獨徃意欲問復忘言

城樓望水

是日龍掛影

遠水全無地。高城略近天。龍吟忽半見。虹飲競相鮮。魚
鼈爭乘渚。兒童狹濟川。秋風只昨日。物意已蕭然。

送南昌郭主簿

楚劍烜照地。梅真從吏鄉。簿書非急務。鴻鴈試高翔。狸
品牛尾貴。茶牙鷹爪長。因君訪風土。游子不能忘。

公是集卷十九

